

06/11/1998

Malaysia, Singapura sepakat perbaiki hubungan

SEPANG, Khamis - Pemimpin Malaysia dan Singapura hari ini mencapai kata sepakat untuk sama-sama berusaha ke arah memperbaiki hubungan dua hala serta mengetepikan apa jua perselisihan antara kedua-dua negara.

Pertemuan antara Perdana Menteri, Datuk Seri Dr Mahathir Mohamad dengan rakan sejawatannya dari Singapura, Goh Chok Tong, selama sejam setengah di Kompleks Bunga Raya Lapangan Terbang Antarabangsa Kuala Lumpur (KLIA) di sini, menghasilkan keputusan memberangsangkan termasuk dalam membantu krisis ekonomi negara dan menyelesaikan masalah bekalan air di Singapura.

"Kecuali ada pihak lain yang membangkitkan sesuatu. Saya tidak akan berbuat demikian. Kedua-dua pihak tidak akan berkata apa-apa," kata Dr Mahathir dalam sidang akhbar bersama Goh di Hotel Pan Pacific KLIA.

Perdana Menteri menjelaskan, dalam pertemuan itu, yang kelima antara mereka tahun ini, mereka berbincang mengenai usaha memperbaiki hubungan dua hala Malaysia-Singapura.

Antaranya ialah bagaimana Singapura dapat membantu Malaysia yang sedang menghadapi krisis ekonomi dan bantuan air dari negara ini bagi memenuhi keperluan republik itu.

"Kita perlu mengumpul dana di Singapura dan republik itu berjanji untuk berbincang bagaimana ia boleh memberi kerjasama yang baik dalam soal itu. Kita juga akan menentukan berapa banyak air yang diperlukan Singapura dan bagaimana kita boleh memenuhi keperluan itu," katanya.

Goh melalukan lawatan sehari atas jemputan Dr Mahathir bagi menyambung perbincangan mereka mengenai pelbagai isu dua hala, di Johor Bahru, April lalu.

Ditanya sama ada hubungan renggang kedua-dua negara beberapa bulan kebelakangan ini dapat dipulihkan, Dr Mahathir berharap hubungan itu dapat diperbaiki.

Hubungan Malaysia-Singapura terjejas berikutan beberapa isu, antaranya soal pemindahan Pusat Kastam, Imigresen dan Kuarantin (KIK) Malaysia dari Tanjong Pagar ke Woodlands, pencerobohan ruang udara dan tindakan saling mengkritik pemimpin kedua-dua negara.

Mengenai KIK, Perdana Menteri menjelaskan, beliau berbincang dengan Goh mengenai perkara itu tetapi belum mencapai kata sepakat.

"Jadi, kita membuat keputusan perkara itu akan dibincangkan di peringkat pegawai," katanya.

Dalam sidang akhbar yang sama, Goh menjelaskan, perbezaan pendapat tetap wujud dan akan terus berbangkit.

Bagaimanapun, katanya, perkara paling penting ialah kedua-dua negara berusaha merapatkan jurang perbezaan dan berusaha memperluaskan ruang kerjasama bagi kepentingan bersama yang sedang dilaksanakan ketika ini.

"Jika kita tidak bersetuju mengenai sesuatu perkara, kita akan menjelaskan perbezaan itu dan berbincang mengenainya pada masa lain," katanya.

Mengenai langkah Singapura membantu ekonomi Malaysia, Goh berkata republik itu akan memastikan keperluan Malaysia dalam soal ini.

"Dr Mahathir telah menjelaskan apa yang diperlukan Malaysia dan kita akan memulakan segera.

"Butir terperinci mengenai perkara itu akan dibincangkan pada peringkat pegawai. Kita tidak boleh jelaskannya di sini," katanya.

(END)